



Minggu, 21 Juli 2024
Ogen : Lukas 10:39



Megiken Pengajaran Jesus



Secara perdaten Jahudi, adi reh temue ku rumah maka diberu kuskas ngelai temue e. Nikapken kai siniperluken temue, segelah temue pe malem atena kesilang ku jabu e. Maria sekalak diberu, si oratna secara kebiasaan ngeluh kuskas nikapken siniperluken Jesus tupung reh ku rumahna, tapi la ngelakoken si e. Tupung reh Jesus ku rumahna minter kundul ia deherken nahe Jesus dengen megiken pengajaren Jesus. Idengkehken Maria sinituriken Jesus, alu fokus labo alu janah-janah. Perbahanen Maria enda ncidahken perbahanen sekalak ajar-ajar (murid), si ndeher ras guruna, dengen mereken diri guna ngaloken pengajaren. Sekalak ajar-ajar si meteruk ukur mereken dirina guna megiken teptep ranan sinibelasken guruna. E maka ingan si mehulina megiken pengajaren e me deherken nahe guru, sabap i je tangkas ibegi pengajaren sinisehken e.

Ieteh Maria kal nge si tuhuna maka oratna ia kuskas nikapken pangan ras sidebanna man temue, tapi i bas paksa si e Maria pang ndarat i bas kesemalen geluh tupung si e sabap ietehna maka si reh e me guru si mbelin, meherga teptep pengajaren siisehkena. Kesempatan e me si mehulina guna ngaloken pengajaren e secara langsung labo erkelang-kelang.

Arah kai si bahan Maria enda mereken mplimbarui kalak si enterem maka si la banci ilewatken i bas kegeluhen e me megiken pengajaren Jesus. Megiken e la banci mekarus entah erjanah-janah. Megiken pengajaren Jesus bagin si seh kal pentingna bas kegeluhen. E me si nomor sadana, i datas tradisi entah kebiasaan perdaten bagi si lakoken Maria i bas kegeluhenna. Ula min sempat tading si pentingna erkiteken si penting. Melala dahin si penting tapi si terpentingna e me mereken diri megiken pengajaren Jesus. Maun erkiteken lit dahin si penting piah lupa kita muat posisi bagi ajar-ajar si megiken pengajaren e, umpamana tupung jadi kepanitian, entah nyonya rumah bas PA ras sidebanna, siakui sibuk kita tapi ula erkiteken sibuk e tading kata Dibata si man baginken.

